

四庫全書

集部

欽定四庫全書

集部

午亭文編卷十四至

七

詳校官庶吉士臣汪彥博

助教臣常循覆勘

總校官庶吉士臣倉聖脉

校對官中書臣牛稔文

謄錄監生臣袁繼升

欽定四庫全書

午亭文編卷十四

大學士陳廷敬撰

今體詩

丙寅元日

曙色初龍右掖門上趨北極侍含元
鑪烟風轉銅龍仗
燎火寒迴白獸樽欲報
聖朝無闕事濫重經席是

深恩多慙衰鬢青春早暎日宮花壓帽溫

敦復澹人二學士見和除夕元日詩疊前韻二首

春色蓬門取次還總無過客也須闌休辭白墮頻傾醖
頗却青錢忘買山爆竹誰家方競勝桃符昨夜暫投閒
椒花滿眼紛相映笑煞頑夫老更頑

粗治文書久拒門年光幾度向朝元殘經獨抱時開卷
歲酒將闌已合樽悶遣葦桃驅路鬼戲從魚鼠問長恩
春寒切憶鵷鸞侶身在凌霄氣象溫

上元夜扈從出永定門作

對仗金牀下殿行
玉街車馬溢春聲
天迴烟景低帷殿
野曠星河出幔城
北斗龍杓隨鳳輦
東風畫鼓雜鼙更
歸來獨擁殘書坐
一穗缸花夜笑生

李唐長夏江寺圖於

大內見之宋高宗題云李唐畫可比唐李思訓

花石網殘艮岳空
湖山金粉畫難工
那知零落風烟外
卻閉金函玉櫝中

水邨圖二首

并序

水邨圖趙文敏筆也自署云大德六年十一月望為錢德鈞作元人題者五十人皆秀逸可喜康熙二十五年歸於

大內時在直廬得縱觀記以詩

秋雨秋風澹墨間燕雲粉本映關山百年智巧銷磨盡
却在清江水石間

菰蘆門外水連天我已移家約釣船從此烟波秋色遠

憑誰先寫舊樊川

張尚書賜金園圖

鸞坡鳳閣畫沉沉
畫裏龍眠著意尋
田宅漫成歸老計
江湖頻有託居心
買山不比千秋觀
置酒何須太傅金
直使

君恩滿巖壑
流傳勝事紀園林

春夜懷富雲麓侍郎

勞勞亭下水淙淙
送客沙頭倒玉缸
萬里長風吹別袖

五更疎雨落寒窻，
魂炎海離愁濶。
過眼紅塵老淚雙，
城角欲殘清夢斷。
相思惟有片心降。

新居送素心歸里

窗閣新開客過稀，
茅茨只似舊雙扉。
清明歲閏花禁圻，
風雨春寒燕未歸。
青鬢流年思弟妹，
白雲長日戀庭闈。
因君為問田園事，
何處烟波無釣磯。

陳白陽畫果蔬二首

正是江天櫻筍初，
谿邨風露擷園蔬。
春花開落多秋實，

老圃吾生愧不如

肉食朱門客滿堂何人解識菜根香
鱸魚大有江東思只是蓴絲味亦長

晦日信芳齋遣興

萋迷春色老塵沙晦日風光感物華
粗有軒窗安客舍儘教籬徑似山家
天涯裊裊逢歸燕世事紛紛送落花
一種垂楊愁萬疊輕烟搖颺日西斜

楊花六言二首

物態森如枳棘客心弱似楊花忙過雕闌玉碣閒投茅
舍山家

垣短條垂弱縷水明葉蘸微波燕語巧催春去花飛知
奈愁何

賜衣二首

有序

閏四月二十八日直

內庭

上遣內侍問臣廷敬在否有頃費

賜御服紗衣

臣

同英

臣

士奇

臣

訥實被

恩賚穀文金鈕御香宛然且

諭曰是朕所嘗服者

臣

服之感而紀以詩

天機雲錦

帝垂裳解賜丹霄黼座旁不是裁縫収在筍玉簪新染
蚤時香

碧紗鍼縷海圖明垂領蕭蕭素髮驚天上著來人欲老
不禁清淚卻霑纓

齋中讀書即事二首

繙餘殘史意厭厭清簟斜曛晝下簾
笑憶相如逢狗監懶從詹尹拂龜占
心如苦筍風還折愁比黃楊閏更添
刺有草庭生意在筆花頻夜夢江淹

花時事過甘頭白老境春殘奈酒濃
近日情懷還漫浪幾人語笑更從容
歸田已媿陶彭澤矢口常憐阮嗣宗
遺事吟殘杯一進五更睡美不聞鐘

次韻繆虞良見懷之作

載酒題襟少舊歡
鬢絲藥裏在長安
翻餘汗簡常多忘
畫出河圖欲細觀
時方學易
薑蔗歸田羞負郭
風騷投老笑
登壇知非已
迫桑榆
晚袖裏殘文擬自彈

送故人王德新還太原三首

明月關門影漸高
朔風猶照舊綈袍
離情遠似桑乾水
難斷并州快剪刀

白雲汾水影離離
又是秋風雁去時
落盡別時官閣柳
晉陽宮畔最相思

曾將刀筆傲通侯，掛檄歸來汗漫遊。
畫榼香螺桑落酒，

青州從此勝涼州。

王嗜酒，選為尉，不赴。

琉璃盛水蓄魚如鰓者，三兩頭外視之條小而大。

游泳下上而見魚之多，至不可勝數。于子龍秀

才為詩戲和。

掉尾鯨波笑伏鱗，眼光如海蝨如輪。
晴牕試檢蟲魚注，亦是天涯磊落人。

丙寅除夕，撰易圖成，示虞良樾，并

玉漏金壺夜色新
藜牀蔬食不嫌貧
自成蕭索門庭在
無那歡娛節序頻
蠟炬椒花迎歲酒
火銷香炷隔年人
更闌點檢殘經罷
勘得浮生處處春

丁卯元日即事示兩兒

華髮朝天蚤劇忙
青春閉閣興還長
年光得得如流水
旅夢蘧蘧向夕陽
騷子誦詩驚過客
虎兒弄筆勝諸郎
一枝應逐桑榆煖
三徑何當在

帝鄉

卷十四
初春與與可

書卷生涯避要津
雀羅門巷燕鶯頻也
浮翠柏尊中酒已放
紅梅硯北春
五夜霜霏殘醉醒
萬家烟景一時新
朗吟夢草西堂句
好在池塘未是貧

上元夜簡

內直諸公

曲宴傳柑記往年
疎星澹月故依然
張燈小巷春無那
羅雀開門意自便
節過欲泥丹竈火
夜來重爇

賜鑪烟九衢簫鼓三更夢又是

君恩放假眠

寄湖上翁呈敦復翁敦復兄也

久向烟波擬釣筒移家有約竟成空平生解愛江南客
晚歲心知湖上翁香草舊蓑閒卧月蘆花小艇不驚風
眼明細寫烏絲字寄與東華問軟紅

晚春下直同健菴侍郎

如寄人生欲奈何野桃村柳又蹉跎百年強半酒人散

往年春日嘗與苔文
貽上諸公水樓看柳

二十四番花信過細玩流光真漸

少總櫻塵網也無多軟紅歸馬東華路好點青燈照醉

歌

閱農應

制

四月十日

御乾清宮臨視諸臣作

聖作勤三事

天行啟四聰有年惟

帝力無逸即田功桑柘扶鑾輅茅茨駐玉驄野花穿仗

發山翠拂旗空壤繡分交錯川長引鬱葱嘉禾方剡剡
瑞麥已芄芄鶯度濯枝雨柳眠吹絮風周原千畝綠漢
粟萬箱紅下濟光明遠高居造化工年華丹禁裏烟景
慢城中粒食增堯七熏絃倚舜桐九農應送喜歌舞海
隅同

禹鴻臚畫樊川歸樵圖

巷柳園花又一巡二毛加白向青春平生但可供描畫
面目於今是假真蔡澤輕肥原有相揚雄容貌不踰人

東新已辨腰鎌具寫入樊川小樣新

晚同儼齋侍郎下直

長遣雙扉去後關曉風驅馬夕陽還
曹司愧點圖書地筋力虛陪供奉班
正落殘花留意別欲棲幽鳥笑人頑
城鐘未起燈初上了得公家事蚤閒

排悶

一步強彎一寸弓滿船齊看滿帆風
呼牛應牛故爾爾得馬失馬何怱怱
橡栗生涯愁杜甫蛙蛇家口老盧仝

此身真作浮游計到底輸他造化工

閏歲七夕前二日

咫尺神霄奈若何頻年相望不相過
頭童烏鵲忙如許節厄黃楊閏較多
秋到雙蛾驚歲月天留老眼見星河
九疑凝目峰皆似不比盈盈一水波

蓼花

臨砌妨檐短秋來娟娟長綠梢
新雨霽紅透晚風涼野水蘆花外
江村竹篠傍只應伴苓箬繫艇近斜陽

七月九日

召左都御史

臣

廷敬侍郎

臣

乾學學士

臣

英侍讀學士

臣

士奇

編修

臣

訥

賜食西苑秋雲亭遣中使就賜

御書及內製法瑯塗金鑪鉚匙箸香合各一恭紀五首

駕行拂曙影裊裊風舞槐龍翠作堆北極金輿天上轉

西清黃繖日邊來從容刻漏傳仙饌親切烟霄侍

帝臺

詔許甘泉承曲宴幾人榮遇得追陪

御匱書卷日相隨

勤政簾前奏對時
文園先知新稼穡
堯階不剪舊茅茨
渚花含笑移舟近
水鳥銜

恩度檻遲自有衢樽聯鎬飲
微臣長誦蓼蕭詩

鈿軸開函翠帕舒
義圖頡迹豈能如驪珠
何止千金賜
鳳藻曾經萬卷書
日歷定須編翰簡
流傳應許到樵漁
桑榆記取茅檐下
長捧

恩華望屬車

珍錫琳瑯列禁筵博山新製侑嘉籩含熏欲泛金莖露
宿火猶分玉篆烟光爛卿雲逢舜日文鐫寶歷紀堯年
銀罌翠管休相擬歸路天香滿繡韉

龍尾追趨內掖門綴班烏署直微垣飫知

中禁蘭庖味別賜西園玉膳恩坐對宮花偏露重歸來
臺柏帶春溫叨隨芝閣分藜火剩有冰心奉

至尊

九日晚晴臺泥飲

九日怱怱節序頻高臺搖落上逡巡生逢白髮相欺老
家有黃花不厭貧愁遣眼前憑濁酒名爭身後是癡人
牧之詩句陶公興笑口常開漉葛巾

鄉人王疎菴先生為太宰時構水鏡堂於署後之
東南隅余在翰林以事曾一至焉今謬繼公後
瓦礫茂草故處不可復問冬夜宿署中感而有

作

水鏡堂曾到遺蹤，悵莫尋鳥栖荒署。蚤葉落短垣深黯。
澹題名字蒼茫，啟事心夜寒霜月白，猶照古藤陰。

靈祐宮夜憶石閭

抱膝支頤計未非，黑甜贏得斜暉。飄蓬欲訪敲爻去。
度世終思跨鶴飛，自為逃名甘隱吏，已因觀妙解忘機。
石閭流水寒松夜，一枕騰騰夢裏歸。

五十初度

華髮童心老竟真，自驚身埒老人羣。新詩翻許推高適。

健筆猶誇屬右軍
梅柳眼看過至日
犁耜手把向春雲
青山舉白一浮汝
自此相從已暮曛

夜過六友齋與樾阡

客舍一柴荆
歸時夕照明
寒花簾外影
新雁月中聲
老境親書卷
幽懷託友生
秋齋燈火近
城柝易深更

與芸夫

沙塞鴻飛日
風林葉落時
百年猶旦暮
往事益淒其
屠狗身宜貴
雕蟲技未奇
急將瀟灑意
為緩鬢成絲

晚晴臺咏懷示謙吉

晚晴一上晚晴臺
片片明霞映酒杯
燕掠檐牙殘靄去
柳低樓角夕陽來
經過物理愁眉放
勘破生涯笑口開
田舍未成頭半白
青山買得敢裴褰

大行太皇太后輓辭六首次都御史徐乾學韻

帝孝重華並

慈徽太姒齊

陵園新玉座
匱匣舊金泥
長樂疎鐘外
瑤池落月西
雞鳴思問

寢龍尾接城隄

警衛連宮仗行帷出苑牆
鶴驚宵館露鳳咽曉樓
霜晏柳飄哀輓
陵花濺淚行盡聞

天子孝親切侍中郎

尚想戎衣著謳歌起鎬豐
親逢開創日身享太平功
文物三朝備榮哀萬國同
還因思厚載率土泣攢宮

倚廬心未已歎粥孝難名
素勒鑾刀斷

詔步詣陵園斷輦綯以

示不御青繩砥道平攀號

天步遠顛顛

聖顏清臣庶皆人子誰無感激情

神光留武帳雨淚變

彤幃雲慘青山暮風纏紫極悲金蠶寒食後玉燕上陵時
苑柳年年發長垂

寢殿枝

禮成衰絰盛制與諒闇同

詔諭情何限封章意未窮
劬勞知

聖德忠愛結臣衷孝饗榮名貴清歌小閤宮

王黃麋在吏垣有文名沒三年矣夜宿省中追悼之
禁掖難勝感舊情諫坡留得幾人名夢醒月落朱顏在
宿草春來老淚傾

孫忤庭少司馬來赴

國恤憶徃時余與忤庭同環溪先生禮闈校勘連牀數
晨夕今蔚州歿而余銘其墓不勝存亡之感

知君定似阮光祿朝罷

山陵却便還忍說淒涼十年事更誰追別到方山

歷下羣公海嶽姿風流耆舊是人師相逢一事煩傳語
無愧新阡有道碑

合和羹二首

并序

合和羹襍菽麥野菜為之太史公所謂民之食大抵飯
菽藿羹者是也然自秦及燕趙皆食之而南方聞者每
竊笑焉嘗與南溟湘北宿左闕下二公皆南人而獨喜
食此且為歌詩以見贈余亦和而歌之所以志余之辱

交於二公亦以物之幸而見知於世有如此也

衢歌含哺敢忘情華省翻成麥飯名不笑唐風多儉陋
茅茨曾啖小人羹

鹽豉休烹婁護鯖山蔬點就瓦盆盛交情淡久真如水
肉食何人憶大羹

大行太皇太后仙馭遐升

詔行倚廬之禮百官有司更進遞諫
詔旨開喻益切宣聽之際恭紀以詩

彩仗金輿隔暮雲倚廬涕淚濕斜曛已知孝饗同虞帝
何止期禪似魏文苴杖三年千古事封章一日幾回聞
他時青簡留題處惟有芳名屬

聖君

除夕同南溟容齋即事二首

一院梧桐影漸移西垣山色在簾帷欲尋巖壑抒心跡
辦取樵漁寄鬢絲林鳥倦隨鴛鴦後野梅蚤避燕鶯時
草廬門巷斜暉外禁省端居有夢思

樞馬林鴉節序頻同曹聯步集蕭晨銅龍日冷東朝會
金爵星明左掖春欲盡漏鐘添一歲不須杯月得三人
疎燈寒燼淒其夜青瑣相看鬢似銀

鹿尾

塞草秋肥斑鹿鳴那知斷尾是珍烹三驅解識

君王意長憶

慈寧進

御情

戊辰元日左闕下呈南溟容齋兩少宰

過眼交遊閱世忙，星趨漏散只隨行。
春遲荀令香三日，

正月三日立春

花共江淹夢一牀。剩有蓼芽驚節物，更無綵勝

惜年芳。相依渾似舟船坐，夕照蓬牕影漸長。

疊元日韻與兩少宰

擾擾塵埃一夜忙，新年追逐在班行。
崎嶇阮藉東西路，顛倒元龍上下牀。
臘退柳桃應自媚，辛殘薑桂有餘芳。
蒼顏白髮吾曹甚，愁入青春睡味長。

春宿左掖高二鮑給事空所居室以居余二鮑工
畫嘗為余作修禊圖末句及之

掖垣栖鳥暮啾啾襖被居然接勝流賀革方牀纔六尺
士龍瓦屋在東頭周廬宿火多時共燕寢清香盡日留
不是南山來伴直畫圖輞水已同遊

春日晚歸書懷

一官遲重寸心清榆莢園時柳絮輕衣上緇塵渾不染
鏡中華髮蚤忘情鶯花怨客侵愁老蟣蝨欺人薄肉生

暝色不歸歸亦倦
擲揄路鬼正縱橫

睡起晚晴臺野眺懷南谿遊好

一枕黃塵眯眼開
關河清夢片時回
屢因春睡思長假
祇為鄉心上小臺
雙闕萬家還閒寂
孤烟落日共裛裛
故園只在青山外
管領鶯花待我來

昔使廣寧出東便門十三年矣今春重過此門感
成

城門曉色暗啼鴉
征馬長嘶向磧沙
雨雪關山初出塞

清明時節正思家鄉心萬里逢歸雁野館三春見落花
少壯遠遊俱寂寞祇應衰老惜年華

大風落花二首

自入青春只醉眠花開花落捲簾前顛風作意吹將去
不是花時不放顛

風本無情一陣空花如有意向春風殘香徙倚斜陽外
飛入懷家酒醖中

口號與翁寶林少宰

春城楊柳三眠後江館櫻桃九熟時
贏得殘年歸計晚
眼中花霧鬢邊絲

九日夜雨

何處登高會端居獨掩扉
草蟲聞自語霜雁遠還飛
殘夜開籬菊高秋見篋衣
南谿今日酒醕酤幾人歸

雨夜懷思母菴

小幕牕風入閒堦檐溜懸
苑鐘疎點外塞雁曉聲前
漱石三秋雨流花第二泉
為親從祿仕書信問歸田

樊山
慈泉

第一泉也菴
之泉為第二

送荀少之官臨相

落葉滿征衣
鞭絲掛夕暉
壯遊非寂莫
歸興卻翻飛
白髮一莖蚤
黃金萬事違
宦途憐小弟
慎莫愛輕肥

畫鵲雀

翻翔鵲雀在高秋
老隱天台用意幽
但欲雕龍開別墅
至今常笑郭營丘

題蔡方麓修撰寫真二首

青縑被暖火紅銷正是熏衣事蚤朝幾日金鐙歸院晚
天寒須整侍臣貂

蓬山靈鵲鎮常啼鈴索聲寒曉月低一卷牙籤心十載
東華壯鑰汝南雞

橄欖

祝鯁何煩戒老饒解醒不畏酒頻添葉飄擗柳枝邊弱
身帶桃膠味後甜誰解撥魚堪作楫最愁調鼎要無鹽
縱教苦口心還在寒綠森森色正嚴

歲暮閒居二首

頻年萬事苦紛拏，頗喜衡門賦索居。
子度何堪署紙尾，河東空解誦亡書。
江梅有信衝寒蚤，牕樹多情帶月疎。
茗椀藥囊隨客意，殘杯冷炙待何如。

平生寂歷少清歡，又覺蕭條節序闌。
世上宦遊今已足，天涯風物幾回看。
杏花眼孔三春熱，梅子心腸隔歲酸。
迂叟當年思一笑，閒居洛下不休官。

戊辰除夕與樾軒

休將樂事等虛名魚躍鳶飛妙臭聲千仞跛羊行自喜
一時駑馬路羞爭冰霜不惜經殘夜泉石終堪託此生
會得舞雩童冠意春風何處不春情

己巳元日與樾阡談白沙之學效其體作二首

桃符土梗浪相侵舊雨何人肯見臨一日又過誰用力
百年空老未求心鶯花有約春還到風月無邊樂重尋
回首姚江成別派輸他嶺海自閒吟

歸老義文物候侵更看著枋布成臨

布著得臨卦

詩因聞道

知真味學不求名見自心
白日只今耽酒過黃梁何用
曲肱尋紛紛得失遺編在
留與閒人作笑吟

春日出城看花戲作四絕句

賣花已喚山桃開馬軍走探園花回
風花爛熳喜相報
明日不出狂枝摧

出門十里旋治裝賃車借馬半夜忙
料得旁人破口笑
觸忤物態神暗傷

西鄰杏花亦不惡兩頭夾籬牆邊紅
比似摩訶菴裏樹

千株萬株同春風

憶昔年少看花時城邊水樹梁園池故人雖在少音信
閒門惟有春風吹

春日經水樓感舊

浮雲閱世閉門中惟有閒游事不空過客竟誰如舊雨
尋春相識是東風多情柳絮依然白無主桃花只自紅
吟散酒樓人在否懶將詩句寄郵筒

春遊

韋曲城邊灞水涯
詩籤酒檢鎮常隨
閒花滿樹春蕪長
正是先生行樂時

社日遊城南看花不飲自嘲與樾阡

黃四娘家花朵紅
多情白髮颺春風
佯聾入世君知否
社日何妨酒醖空

竇在茲至懷韓韓山

問汝西來事韓山
是小山飛花隨釣艇
叢桂掩柴關
枵問經時別低徊
落月顏相憐
清泊曲幾度共潺湲

書查夏重蘆塘放鴨圖二首

春水江潮掉浪輕
扁舟烟雨有誰爭
白鷗萬里滄波興
偶寄紅闌鬪鴨情

君是金鳬殿裏人
寒蘆鷗鳥却情親
相隨欲作江南老
魚藻池邊又過春

社日不飲有詩漫與樾厓
未幾兩耳岑岑有聲經
旬不散對酒戲作

顛倒春來事
沉寔物外情
一杯還酩酊
兩耳任嘲轟
鶯

語都無次花飛別有聲回憐社日酒爛醉不辭傾

春晚

檐角殘紅斂牆陰暗綠斜月侵飛絮柳風弄折枝花春色閒將盡霜毛陡自加不愁難過遣飄忽是年華

書局與健菴

池上人看老鳳來多情鷗鳥合相猜休言洛下閒居事猶是西京御史臺

孝懿皇后輓詞六首

軒曜璇階映長秋網戶絨玉衣人自覆石字燕來銜鍾乳調靈七文螭進別函椒塗纔隔日園寢泣松杉

長慟彌留際綸衣送寢門大文推陸九盛典邁貞元冊謚崇朝並榮哀奕葉尊勤民知內治脫珥是深恩

白日淒蘭殿清秋冷桂宮星娥一夕返雲馭九霄空淚濺銀河水悲纏玉樹風詠歌傳六寢應紀二南中

楚輓悲驚輅虞歌咽鳳旂燎庭殘曉月叢殿落秋花北首青山近西風綵仗斜公桑零露葉猶望濯龍車

每憶朝

陵日宮車並往來花迎綃帳合柳拂幔城開輦路皆陳迹山園引舊哀夢迴閑故館涼雨濕莓苔

景霄凌烟貴神儀偃月長安貞應地厚聖善翊

天王異豈徵沙麓祥曾定洽陽

宵衣思女則遺澤及遐方

竹林寺觀一峰道人畫

千古高風憶閉關地偏人靜軟紅間坐深祇樹雲常定

朝散清都鶴自還身度尾箕燕斗宿跡留方丈海神山
前塵影事三生話珍重晴窗學駐顏

木瓜二首

正是橙黃掩綠陰秋烟一樹照華林
色殘橘柚揚州貢投比瓊琚衛叔心
霜實豈應防化枳寒香終不逐來禽
宣城洛下無芳訊長伴江梅入夜吟

朝雲晻靄忽蕭辰纔過花開落實新
盧橘寒分秦苑雨海棠色借蜀江春
削泥藥籠兼防老漬粉香墜不勸人

更與封題霜後顆清芬也合避緇塵

午亭文編卷十四

欽定四庫全書

午亭文編卷十五

大學士陳廷敬撰

今體詩

巢燕再逾年復至

風埽巢痕在今年燕子回語多如有訴別久莫相猜芳
徑春泥落雕梁夜戶開翻驚此時節去歲不曾來

追和南溟韻四首

寒壚淪酒夜霜濃醉別西垣夢裏逢一院梧桐秋影散
併將風落入飄蓬

蘄樓明月照相思曾是金樽宴別時萬里碧空消息斷
天風吹墮玉霄詩

金閨楊柳落疎林香散羅衣怨葉砧未老蛾眉恩總在
幾回憐取白頭吟

眉羣騰蹋過羊腸力盡金鞭去渺茫近見紫鸞書一紙
人間路比海天長

再到冬官署中與劉雨峰

東閣南枝放早梅何郎水部有詩才
書生自笑曾前度
小睡槐根墨夢回

松泉寺晚宿

松泉寒夕照黃葉墜疎村
石徑秋花弱風廊佛火昏
川長雲宿渚野曠月臨門
鐘磬此俱寂霜林夜鳥翻

送金會公歸蘄春

朝發新津海月斜
潞河雲水極天涯
飄殘暮笛江城柳

照徧離樽上苑花紅燭三條知己淚秋分五色故侯家
頻年萬事悲歌外至竟騷人楚調賒

九日晚晴臺登高

臺為登高面落霞薊門山色晚晴賒關河風度長城雁
節序霜回小院花南陌咫尺天如杜曲東籬終古是陶家
衰遲醉舞秋鐙下顛倒茱萸插鬢斜

杜遇徐司寇以合歡花葉為酒示余以方釀成飲
而陶然賦謝

黃落庭隅樹封題葉半新花應知夏五

花開以五月葉及花未開

酒已作逡巡米勝修羅法香逾麝米春嘉名愁頓失况復飲吾醇

飲合歡酒疊前韻簡杜司寇

青裳風汎溢紅頰暈鮮新見少常深酌無多祇一巡西

家非醉酒

非醉酒林開府家醞也

東閣太和春

真定酒名太和春梁相國嘗召飲

玉醖空勞勸香醪未比醇

于役潞河見月初上光蠹河水兒子杜履曰此黃

金棟也賦以志興

月滿冰輪霜氣寒東來倒影海雲端
小兒解識黃金棟
供奉曾呼白玉盤
尺五天連河漢水
大千沙傍鷺鷥湍
多情野宿臨流處
自向蓬窓照夜闌

送張僉事之海南三首

五羊城邊竹馬過
琵琶洲上估人歌
使君不飲貪泉水
沈絲休挂珊瑚柯

黃葉初飛黃木灣
鷓鴣聲送早時寒
鐵岡驛前書一紙

秋風篋裏為開看

持節梅花嶺外時
趙陀臺草鬱離離
西風又度昌華苑
秋色年年長荔支

高梁橋二首

日斜秋水急城盡
野橋連靈沼通河漢
公田引澗瀝塹
花隨唼鴨風柳出鳴蟬
山閣清暉裏依稀近玉泉

車箱渠上水迢遞
遠郊畿渡遠分青靄
山長歷翠微落
花穿內去斜鳥帶波飛
無限潺湲意年年送夕暉

王湜菴輓詩

孤風晚節不磷緇矯矯曾為世羽儀
豈信巳辰年至後遽驚庚子日斜時
琴殘最抱人亡恨車過空留腹痛悲
舊德未忘天意在烏衣門第屬佳兒

直廬懷公幹計偕載道

春草相思入夢無龍池柳色映新蕪
玉墀金馬摩挲老悵望吾家白額駒

張敦復尚書屬書齋額仙人好樓居

元龍百尺意橫秋湖海平生已白頭青鳥近傳天上信
果然人在玉華樓

和敦復悼馬詩二首

顛顛金坡蹠蹠行三髮剪出欲平明青絲送老橫門道
不盡黃雲萬里情

驚雷驟雨識危途電火光中躍的盧不為錦障泥暫惜

報恩珍重在斯須

危谿夜雨馬却
立待電光以度

聞中花朝前一日阮亭司馬談江南烟景之勝二

首

柳陰湖水綠平漪
欲傍漁洋下釣絲
記取花朝明日是
幾番風信對牀時

布襪青鞵向若耶
蹋殘香土肯移家
夜來客夢遊天姥
開落碧桃無數花

題燕居課兒圖示壯履

黃紙凋殘舊帽箱
一編猶映紫羅囊
繩牀穿膝知吾老
書案量身覺汝長
自讓輕肥非蔡澤
不憂文史續中郎

紛紛箋注如烟海回首尼山數仞牆

冬官署中南亭敦復所葺茲予再至實承乏公後
而敦復權領翰林夏至之夕齋居有懷

乾坤蕩漾兩浮萍歲月樊籠意渺冥再到冬曹新燕壘
百年喬木舊槐庭吟成白雪人難和夢續黃梁客半醒
惆悵玉堂明月夜柯亭劉井幾回經

六月九日睡起偶書

長夏炎熇閉閣時水曹官冷也相宜盆池萍響魚貪食

梁壘泥乾燕哺兒
鍛火未能同
士季扇塵何惜避
元規
北窓一枕羲皇夢
睡裏蓬蓬欲共誰

量移西曹與可以曹屬引避歸里送別

北隴應騰笑
西曹欲別情
驪駒歌已就
春草句難成
老
眼青山迫
迴腸濁酒醒
到家及秋社
款款話歸耕

西原與友人二首

過雨殘霞一閃明
夕陽林影路迴縈
勸君莫向城中去
且聽黃鸝三兩聲

暝宿烟村生遠情
野亭客夢幾回驚
松牕常有瀟瀟響
不辨松聲是雨聲

露滑閣即目

元龍湖海意闌珊
百尺高樓抵閉關
斜日香臺低碧樹
暮雲粉堞近青山
愁添酒醖真無那
獨對花枝底要閒
卻笑書空殷處士
浮名長戀在人間

新齋十首

前度人還在三間屋
又成劫塵容小住
丹藥覓長生赤

芥分曹日洪厓抗手情別來應未久且緩玉霄行

牙籤新未觸壚酒舊能賒戲蝶輕團陣分蜂晚斂衙粉
牆低過竹籬徑窄妨花莫道幽居小樓頭十萬家

卜築平生意高樓獨上情扶欄新種柳隔葉蚤聞鶯坐
久雲還岫歸遲月滿城稍愁風露夜玉漏太分明

高處三霄近秋來四望低月從遼海上雲向薊樓齊佔
客滄洲酒園丁上谷梨當筵聊一祭身世忘羈栖

草堂兼水石不似在城中柳影魚游樹花梢蝶戲空野

烟濃趁雨林暑薄隨風旦夕簾櫳寂幽懷誰與同

門掩山全見牕回路半分簾花新雨動堦草夕陽熏陰
借西鄰樹涼生北渚雲素紉今夜卻林月照紛紛

鈎簾殘日落移坐遠風斜徑曲供行藥離疎可映花無
題詩得句有酒客忘家最是登臨處秋山爛晚霞

千古高人意風流屬畫師烟雲為供養粉墨自淋漓蹈
海黃金賤登真白晝遲公生有仙骨名已重當時

齊中
藏一

峰道人畫

祕寶黃公蹟兼珍亦世無雲根留米癖樹本見倪迂靈
物如相待斯人可與徒摩挲憐手眼歡賞在須臾

既以黃公

畫為祕寶而元章硯
雲林畫皆齋中所藏

閒庭何寂歷疎雨過廉纖銀浦倒流峽玉繩低挂檐劍
風出匣冷琴露著花霑自忝金閨籍年來仕隱兼

晚行西山道中

一出譙門野興濃迴看樓闕暮雲重西風吹送高梁水
晚影飄殘卧佛鍾十里清蟬聲斷續獨驅羸馬意從容

眼明漸覺西山好
潦倒塵埃萬事慵

閏七夕

閏餘風景故依然
秋未平分月再弦
不為黃楊逢厄歲
那知紅粉惜流年
世無巧歷推今夕
天上仙人應獨眠
寄謝悠悠路傍客
炎涼誰後復誰先

送宋稚恭還鹽城兼寄孫擇菴

名場文讌是離亭
一曲迴腸事滿膺
水鳥聲多喧夜雨
壁蟲吟蚤暗寒鐙
秋來頻送將歸客
老罷真如退院僧

心與清淮流共遠幾回長嘯憶孫登

自嘲戲為俳體二首呈敦復

三復金銘與白圭敢云桃李下成蹊
郁昂一日三回誤阮籍頻年到處迷
伏櫪老非千里驥當關愁奈五時雞
無因一問南華叟秋水篇中物未齊

牕前草長未教除零落秋花伴索居
蝶夢欲成人昵枕崔羅長在客迴車
悶翻千寶搜神記快寫羲之誓墓書
惟有龍眠老居士昨朝瀑直一相於

六友齋遲廖樾阡卻寄

惜別庭蕪長悲秋木葉新西牕涼夜月曾照十年人夕
鳥棲相命寒魚聚自親遲君常卻掃一為拂流塵

贈于千英于嘗受學汪鈍翁

騷衷春遊宛落花銀鞍行處帽檐斜才名潘陸知誰敵
族望盧劉是舊家意氣雲山臨北顧世情塵土蹋東華
傳經往事還怊悵曾向深堂隔絳紗

中秋六友齋翫月同徐子文晷元彥陳叔毅吳震

一方臯宗錢亮工廖樾阡林文淵于千英舍弟
與可兒子豫朋限星稀二字二首

月出吾家冷似冰
肯來相看宿寒廳
明翻烏鵲枝邊見
影傍關山笛裏聽
太白豈應陪皓魄
咸池今已暗繁星
瓊樓玉宇歸無處
顛倒西風濁酒鉗

剝啄何人到落暉
閒堦月上為開扉
坐無北里連錢騎
客有江東大布衣
未比金吾三夜禁
也應玉漏一時稀
銜歡獨倚秋河晚
惆悵霜輪速似飛

梁相國蒼巖輓詩

兩朝耆舊冠公卿，星坼三台暗玉衡。
館閣風流傾後輩，海山位業悟前生。
感深津邸清尊淚，腸斷山陽暮笛聲。
回首雲霄歸去路，已將箕尾署銘旌。

劉處士鰲石餉蜜漬荔枝

塵斷華清晚浴時，春風靈液幾人知。
褰裳自恐妨羅襪，出水誰曾見玉肌。
味美江鮓連霧雨，香添盧橘灑淋漓。
海南嶺北提攜處，憑仗詩情訴別離。

齊宿秋官署中不寐作

舊事新愁歎此身一迴不寐一傷神
打頭落葉生驚汝覆手翻雲儘讓人
明滅曙燈殘焰在籠銅更鼓五聲頻
布衾縮項寒如水笑比鰥魚竟是真

讀漢書二首

酒半驪駒鼓吹聲阿誰結襪向王生
兒童項領公然就何況常遭跨下行

自表門徒為李膺故人相遇避孫弘
可憐赫赫張京兆

曾似將軍過霸陵

齋宿古廟題壁

三間草屋半枯槐
壞壁難禁風雪堆
除卻秋官涼冷客
門前騶唱不曾來

河內竇生有江南之遊寄訊

南遊濟水北遊燕
說著江湖意杳然
與住太行峰上下
一生長似北流泉

和張尚書芙蓉島新題十韻

松堤

草鋪綠裙腰水繫青羅帶何似蒼松鱗十萬森羽旆

芙蓉岸

灼灼拒霜花風前顏色久蕭森蘇公堤應悔樹桃柳

青槐陌

紫陌紅塵路常時共往來迷花倚石處猶見舊宮槐

蓮谿

木蓮欲作花水蓮半著子將花比人面兩兩皆相似

杏圃

塞北山杏多江梅藏花鴈江南野梅多文杏栽於圃

桂叢

昔我山中室其名亦桂叢幽香在何許到處逐秋蓬

余山

中室亦額以桂叢

楓亭

楓亭名轉佳丹林交葉露借問金閨人何年此中住

蘭皋

東臯被香蘭不異在空谷風吹無人時芳意抱幽獨

竹垞

紗帽烟梢眉山衣露篠霑萬竿須截去風月可平添

薇館

紫薇百日花溫室萬年樹君坐黃昏時試咏白公句

寄思母菴孔道士

噩夢宵來記未真任他翻覆訴庚申愁多命薄吾還厭
莫訝彭尸去住因

白雲亭散後呈鄭山公侍郎

背牖山如積歸時每夕曛茶瓜當暑並眠食向宵分影
散絺衣月涼生竹簟雲客愁連短夢心緒仗夫君

冬夜懷李奉倩侍郎

待蚤星稀落歸遲月半傾老嗔兒問事貧遣僕歸耕簾
動霜涼入書收燭暈生公私兼未了相憶一含情

有以剪綵花見遺者戲題二首

誰知羅綺巧相裁也有遊蜂戲蝶來羯鼓無聲羌笛冷

笑看梅柳一時開

綺牕惆悵問江梅何事寒香鬱未開不是青春花信晚
風光愁向剪刀催

贈日者李生

紛紛車馬在簾前也為君平送百錢忝竊韓蘇同命主
不須更算小行年

答劉鼇石

多情詹尹拂龜占羅雀閒門樂事添施就朱顏惟白墮

輓回霜鬢有青粘落梅驚坐香侵硯晴雪流窓玉挂檐
更有舊書消永日醉眠詩句答劉兼

與可談蜀中花木之盛詠懷兼寄素心六箴荀少

公幹

棧閣蠶叢草樹侵雲山萬里足登臨海棠城郭香真好
桂子衙齋月自深五畝田園何處就十年栽種可成陰
牛車下澤安吾老花柳前村共討尋

壬申元日即事呈史館諸公

天迴圭景測銅渾碧落年華上曉暎左个蚤傳新歲令
夕垣還赴晚朝恩爆餘竹火緇青簡頌就椒花泛綠尊
十載

御錢虛拜賜春筵餅餌愧盤飧

向雲澤直史館有每更五日直已是十年留之句
以史事之難也為廣其意

東風逐驕驪蚤出闔雞坊簡竹青連舍書籤綠映牀落
花春水細垂柳夾城長荏苒更番直猶勝陞楸郎

蚤春因錢越江宮洗寄楊玉符編修

直草詞頭日未閒
懷人亦在簿書間
星霜萬里音難寄
雨雪高城雁又還
往事夢魂鈴索地
春光楊柳玉門關
邊沙爭遣蛾眉老
五葉靈根解駐顏

青藤館書睡懷錢亮工

午雞猶在枕不似蚤時忙
花影交殘夢茶烟引細香
春多行樂徑人在著書房
汗竹紛難就青藤蔓許長
清明前二日集黑龍潭濟南張秀才嶠來會

家傍城南杜曲天春遊常在燕鶯前霜教點鬢
簪渾無賴風為吹花太放顛四海賓朋千里到
百年烟景一生憐糟牀未快淋漓興野水添杯
更接連

春夕懷李漁邨翰讀

半銜山日送春陰歸鳥棲迷不擇林帶月雁高
城影盡吞花魚避樹痕深流光差可供遊戲物
理何須問陸沉五岳能消幾兩屐圖經點就與
登臨

漁邨方志五岳

輓太原故人王德新

碧玉晉祠水白雲汾上秋故人今不見攜酒昔同遊
漂泊醉鄉老沉冥仙者流天津橋畔望長憶董糟丘

城南張氏園置酒招向雲澤廖樾阡于千英同遊

命豫朋同作三首

宛洛花邊騎新豐市外塵池臺三畝並竹樹兩家鄰
從容迷花徑教兒近酒人暮鴉終古在撩亂女牆春

舊是笙歌地投壺喚客遊歌桃臨澗道垂柳拂簾樓
落日昭王館春風易水流年年芳草路祇為判花愁

張園絕勝處一半比鄰間苔引春樓堞籬分舊竹闌牆
花歸鳥亂池柳夕陽間不識廬山意多因在此山

春日西原憇常氏園懷玉泉昔遊

卯酒倒春瓶野風吹不醒籬花殘雨澹澗柳古烟青是
往西隄路空眠北里亭金銀二泉氣相對晝沉冥

疊前韻邀張敦復尚書勵近公通政遊西隄

愁處花迎笑眠時鳥喚醒泉流銀浦白山入繚牆青瑤
草三霄路香茅四照亭欲邀湖畔去弄月泛空冥

石閭夜眺南谿

甲戌八月
大祥後詩

鐘磬消沉古廟幽，僧徒曾此結綢繆。
漂流溝水三年淚，重疊雲山兩鬢秋。
檢點詩篇聲斷續，料量身世意遲留。
柴門倚杖寒花外，月上東村幾尺樓。

山牕二首

山牕曙易蚤，雞鳴方未已。
夜來寒松聲，偏入幽人耳。
月上松間屋，水流山半泉。
夜雲行雨歸，曉風為颯然。

高渭師翰讀夫人輓詩

十德聲名舊南安內範良故家開幕府夫子侍明光淑
婉追陶母幽閒溯季姜瑤環榮翟茀繡轂觸鳴璫北闕
方承寵西風忽斷腸三秋搖落候千古別離場人去悲
彤管鐙昏暗錦堂湘魂何處弔蜀魄正堪傷燕市清霜
白金門夕照黃楚游歸計晚潘鬢苦吟長露冷銘旌重
香消寶帛涼夜臺由此隔松柏鬱青蒼

八月十四夜石閭見月感成

萬里空寒碧嶂間松門留影不須關三年涕淚沾襟血

一夜悲歌點鬢斑
明滅村燈沁河水
依微野燒析城山
鞭絲玉漏銅街路
長記鐘魚此處閒

十五夜宿陟岵樓見微月

高峰遠上氣冥濛
峰上高樓四望通
雲樹千重低幔外
河山兩戒曲欄中
桂華寂歷看如霧
霜髮飄蕭映向空
玉兔金蟾知得否
幾人腸斷倚西風

十六夜樓中見月

太行欲落勢還留
迴絕清輝萬象浮
千里斷山迴北隴

今宵明月在高樓飄零舊憶將歸日惆悵翻成獨客愁
纔是平分秋又老金波渺渺去悠悠

孫仲禮過午園貽詩見贈賦答四首

為圃三畦屋幾椽客來誰與共忘年深枝鳥動山池月
寒草螢流野岸烟豈是橫林高卧處偶然清閬小堂偏
多君舊隱西峰下只在溪雲杳靄邊

堂顏清閬來詩以
雲林相況故有橫

林二
句

才名公子舊烏衣蚤歲青山已息機歷落漁樵間故壘

風流臺閣付斜暉河東三篋書還在華表千年鶴自歸

文采清門堪託契秋來時為掃柴扉

仲禮世家
子有文名

楚塞吳天去渺漫太行歸處暮雲端自言雞肋功名薄
不覺羊腸道路難縱酒淋漓溪水綠著書荏苒井梧寒

前村五里山邊霧豹隱何妨拂帽看

君有南
遊詩

紫髯風貌舊儀形懶漫嵇生眼自青樊口野花爭似洛
朱坡清渭不流涇烟雲已被勾留住巖壑從教取次經

車載不須愁健步馬陵秋望氣冥冥

君美髯不
良於步

答孫仲禮次韻

韓宮魏寢久蒼茫
虎嘯何人識子房
綠水紅欄棲隱處
青山黃葉讀書堂
幾迴君去常懸榻
連日詩來少報章
欲訪清溪便乘興
嶺雲無數隔殘陽

山池泛舟四首

晷晷迴廊兩岸秋
綠潭紅樹影悠悠
江湖風水行難渡
爭似橋邊一葉舟

鞍馬平生塞上行
水村花底打船聲
迴思遼海藥江日

一曲烟波萬里情

南垞淼淼北迢迢
畫舫紅燈未寂寥
不到江南人已老
流泉也似晚時潮

橋下清池池上樓
下樓和月上孤舟
短篷小纜纔如許
載得人間萬斛愁

雨中如九仙臺題野館壁

冒雨看山是一奇
青泥白石馬行遲
迢迢不負山靈約
黃葉村前渡水時

登九仙臺

臺在沁河中央
與金焦絕相似

夢裏金焦寺波明兩岸空
江河凡幾曲形跡偶然同
水府蟠根險山靈接勢雄
長川流浩浩俯仰意何窮

九疑臺石樓晚起

曉看白雲近暮宿翠微深
斜月數峰影高樓孤客心
河流無日夜山色幾登臨
應有仙靈在凌空不可尋

石樓夜雨二首

四山昏黑一燈明
寒雨連河客夢驚
萬古洪濤終夜響

欲從此處悟前生

不辨溪聲是雨聲捲簾牕外雨三更山靈信宿知人意
故欲留人一日行

棲龍潭

斷峰臨巨壑開闢意何雄石口排雲黑潭心浴日紅人
傳是海眼天遣作龍宮萬象蒼茫裏風雷起澗中

歸路復雨

豈為登臨歎落暉秋雲三日濕秋衣今年作意過重九

雨裏遊山雨裏歸

九日山齋獨居晚步池上作

暝色下檐際
栖禽喧樹間
采花誰泛酒
臨水一看山
不擬登高去
空嗟為客還
猶憐望鄉處
溪月上柴關

池閣

池閣俯花陰
幽居每重尋
秋高寒水急
山近夕陽深
庭樹留霜果
檐巢長渚禽
寥寥誰共語
樵唱在前林

龍樹掌張氏北樓望底柱山

不辭歷井與捫參望盡三峰路轉侵華嶽斜通西顥遠
青蘿已映北樓深百年過眼浮生夢萬事看山未了心
蚤是雞鳴懷往路要令巖壑快幽尋

舊蹟西峰華嶽
觀東峰青蘿宮

遊底柱山入天井谷衛北山遠來餉食兼簡衷明

府

靈壑青峰入望頻鞭絲烏帽映嶙峋尋山我愧謝康樂
好客人稱鄭子真空谷乍逢如逆旅斜陽立語見交親
因君憑寄神明宰玉洞丹砂不厭貧

王屋山後十方院二首

紺碧千峰萬仞遙，靈風飄緲近三霄。
玉玲瓏處紅塵斷，也恐仙人太寂寥。

三山碧海夢魂勞，欲往從之心鬱陶。
天上豈真足官府，故來人世寄牢騷。

桑林午食二首

底柱山前亂石村，十家今有一家存。
千巖萬壑人蹤在，正是

皇朝賜復恩

石田漠漠草菲菲
破屋炊烟四散飛
行到前村還悵望
五年不見一歸人

王屋北峰二首

北峰畫難如娟妙
方未已不肯在人間
迢迢度秋水
峰色奇如此
天公有意無舉頭向明月
為我問清都

鐵盆嶂三首

空青削山峰
金沙裹山麓
山頭明月行
山腰白雲宿

探奇乃大驚嘆絕但狂叫山僧渾慣見對予發微笑
風洞聞風歸雲窩見雲去乃知風與雲生自無人處

析城道中望樊山

松雲縹緲倚高空無數烟巒遠望通
庑柱三山皆拱北
太行千里盡迴東
登臨早識隨刊意
開闢深知造化功
家向翠微多處在芙蓉
九點落當中

樊山一名芙蓉九點山

午亭文編卷十五

欽定四庫全書

午亭文編卷十六

大學士陳廷敬撰

今體詩

服除七日拜戶部之

命十二月二日次三家店題家書後

一紙書成寄未將五更寒淚濕衣裳麒麟塚在松杉冷

零落雲邊斷雁行

孝章公幹
相次淪亡

趙店見豫朋題壁詩用韻

雲樹東來客夢西
草堂深掩綠蘿迷
三年才盡銷魂路
羨汝詩多到處題

真定蚤發留別梁比部

行盡關山落照邊
鎮州平野遠連天
星霜千里路纔半
燈火五更人不眠
送臘流澌帶殘月
迎春官柳入新烟
況逢東閣郎君舊
客館風光此最便

固鎮遇荀少却別

野店斜暉慘客顏
我行君宿送君還
別離亦復尋常事
無那相逢逆旅間

定興重送荀少

歲晏關河烟景新
東風前路待歸人
灞陵官柳遙相送
直到家山接蚤春

宿琉璃河

白草黃沙淡落暉
朔風吹老塞鴻稀
琉璃河水年年綠
猶是鴛鴦幾對飛

見月

半月辭家見月圓更過半月又新年來時池上松間影
曾照高樓夜未眠

初到京師寄素心六歲與可荀少

摒當臨歧十日裝曾經一日幾回腸登山屐好藏僧舍
漉酒巾閒疊客箱分遣池魚防涸水差排籠鶴借支糧
別來數事皆無恙惟有春鴻惜斷行

蚤春西便門即目

別久西郊路三年復此行城長歸鳥蚤山遠落霞平燕
麥春泥圻桃花凍蕊生高梁橋外水猶似去時清

正月十四夜宿城北僧舍

枕畔天涯閉戶中車輪轉轉馬嘶空牆花影動雙林月
山磬烟消上院風為客行藏如候鳥在家蹤跡亦飄蓬
放燈時節吹燈坐贏得僧牕夜火紅

題量如上人山房

紅石橋西路青春向夕曛蚤花幽處發清磬定時聞野

曠門侵月山遙樹宿雲安心隨地好況此息塵氛

元夜懷午園

燒殘香篆夜何其簾月淒清濁酒卮燈火舊遊初別後
笙歌旅宿獨眠時鎖門池館應通客繞屋鶯花可付誰
憑寄北山猿與鶴相思更不用文移

元夕憶山園鶴

竹廊燈影曲池明正是遊人到處行試向春山聽夜唳
數聲應有別離情

十六夜晚晴臺望香山碧雲諸山寺燈火

山寺數十里春燈三五攢高臺一以見逸興生雲端別
去寄遐想來遊增昔歡千峰與萬嶺日日幾迴看

春夜懷午亭新居

衡茅纔縛促行裝客館重開舊草堂白首逢春花共語
青山有夢睡為鄉萬人似海聲還靜午夜如年漏更長
月落離魂猶未遠依微步履水東廊

酌酒與六歲却送歸

客館風光過眼新
出門衣馬便生塵
無繆還自開詩卷
省事誰能謝酒人
一日須謀千日醉
六分已減二分春
君歸芳草池南路
勤看園花莫厭頻

送荀少返舍

宿火殘紅曉燄新
寒廳相向語蕭晨
千門風雨雞鳴早
二月雲山客去頻
柳色漸深南浦道
桃花應及故園春
我來長憶逢君處
逆旅斜陽淚滿巾

城南張氏園

春明烟景麴塵遮常記名園野水涯歲月漸垂朱戶柳
光陰閒映粉牆花流鶯舊至曾相識旅燕新來是別家
惟有酒帘壚畔月東風依約玉鈎斜

懷荀少

折柳來時路歸鴻別後聲孤燈眠客舍暮雨閉春城野
店宿何處居人同此情更堪故山道明日是清明

舊居遣興

半日清閒半日喧三重茅屋是烟村去隨秋燕辭空壘

來見春花放舊痕
白墮杯乾書在枕
紅塵客斷雪填門
東風自解關山路
寄語萼蕪到故園

見同年潘岍谷比部訊屠給諫芝巖

細柳新蒲綠映空
曲江花有幾枝紅

皇家一榜四百士
白首相知六七公

孫公承恩榜今在京師者七人而已

海上故人如夢裏
薊門落月滿樓中
逢君舊憶銅龍事
左掖清陰入院桐

對酒栽花

對酒栽花白髮翁
衰顏得映酒花紅
一時年少殘心事
來向花邊酒醖中

遣興書蔚州先生詩後

敢將白髮惱殘春
酒暈朱顏也似真
笑向公卿為長物
倦逢花鳥是閒身
米鹽私簿從奴僕
錢穀官書信吏人
挑盡青燈翻舊卷
蔚州詩句不言貧

遊城南三絕句

離花

野水連村盡遠空
柳枝蘸碧漾溪風
落花鋪徑青春去
小住離邊一樹紅

小丘

一笑花邊白首迴
妖紅慢綠定相猜
黃塵萬井春街晚
爛醉城南土骨堆

見燕

秋風吹別舊烏衣
我去重來待汝歸
不分人家雙燕子
等閒來傍野亭飛

禹鴻臚江墅梓花圖二首

枝上烟嵐靄落霞山村回首惜年華
茅亭一樹春光晚
爭似生綃十丈花

婀娜凌霄勢未雄芙蓉雖好不相同
畫師用意曾難識
多在霜根雪幹中

夜行書懷

在家心不樂適遠身如遺
月黑鳥相喚燈明人不知
野烟紫柳宿溪霧捲花遲
獨往念愈寂欣欣亦自私

四月二日

召赴暢春園

賜食瑞景軒泛舟於苑中恭紀二首

鳳掖風微漏點沉
雀羅門掩一春心
三年重續金閨夢
半夜驚傳

玉殿音覆餽易憂筋力緩
當筵惟感歲時深
名花繞坐
搔霜鬢何限
天香上盞簪

銀漢蓬池水接連
太清宮殿渺雲烟
不因侍

帝來天上幾見隨
槎到日邊寶笈圖書編
舜歷金甌歌紀頌
堯年祇應盡却浮塵念
檢點仙官未了緣

是日席布牡丹闌下

臣

坐後一本盛開恭紀一首

羣玉瑤臺歲月賒
豈應春老惜年華
過淮曾未知盧橘

廷敬南未至河淮

入洛今容看魏花
眼霧微消窺綠暗

綠牡丹最盛時

獨趨至花下

鬢絲輕颺拂紅斜
上陽亭北承

恩宴身似登真不憶家

午夢

自掩柴關嬾是真天憐散木寄閒身故教一枕花邊夢
點醒槐安睡裏人

崇效寺看棗花書雪鴈詩後

古城遺壘路橫斜
唐葛林中有故家
會見海榴紅似火
要看仙棗大如瓜
蕊生野桂偏含實
香斂幽蘭未放花
一詠湯休奇絕句
憑將狂語寫槎牙

前日城南獨遊過
素杜少翰林今日復遇之
棗林寺門外戲簡以詩二首

前日烟條拂岸巾
今朝芳草坐成茵
獨遊相值不相訪
始信君家是可人

一笑車輪碾麴塵
相逢不語莫相嗔
五陵衣馬三春後
能解閒行有兩人

杜少見和前詩疊韻奉答

蘆畔青帘似舊斜
玉街走馬記誰家
思君別恨綿烟草
得句風人報木瓜
相贈祇應多勸酒
頻行不是耐看花
吾生萬事皆聊爾
寵辱何須置齒牙

疊前韻和雪鵑

春明歸路日西斜
潦倒重來似出家
上院早過依夏剎
故丘臨別憶秋瓜
往還北陸三迴雁
榮落東園幾處花
再到雙林瞻頂相
半天風雨散簷牙

崇效寺瓜字韻詩已三疊
韻酬雪鵑杜少杜少復
以詩來再疊前韻奉和

無賴城南韋曲斜
妖桃冶杏自家家
閒從月下標宜李
留取亭前署饅瓜
欲解金龜來換酒
正思靈鵲去銜花

紫微郎省文章地，衰散何堪豎頰牙。

來詩有中原獨坐最高牙之句故有

此答

晚晴臺看山有江南之思

春來風景憶江南，無限烟波已自諳。
眼底秦淮頻入夢，晚山如水綠如藍。

邯鄲道上絕句追錄貽羨門少宰

炊熟黃粱已是遲，海山歸路幾人知。
却憐朝市紛紛客，怕說盧生出夢時。

次韻孫仲禮重午西堂會飲見贈二首

紅塵門巷也蕭然心遠方知地自偏
時序總拋青鬢外天涯相聚綠樽前
滄桑過眼曾前度書劍隨身可判年
一卷離騷數杯酒多君苦憶汨羅賢

當時官號領司農耆舊高門榮戟重
兄弟盛名齊賈鳳郎君崛起繼荀龍
雲山蕭瑟思前度風雨漂搖愧遠從
忝竊清塵還贈處詩情冷淡酒懷濃

仲禮先人玉陽胡廣巡撫世父拱陽

戶部倉
場尚書

端午氣寒有節物之感

節物堪驚旅鬢侵今年塵土映華簪
綵絲漫與纏衰臂
昌歎偏能泥苦心
堦下草芽青
圻甲牆頭杏子綠
藏陰生衣未著添涼冷
疊雪含風在笥深

戲次仲禮與豫朋端午酬和韻

浮世功名轉寂寥
魯連蹈海為無聊
趨塵似徯頭慚面
忍事如囊腹愧腰
詩壘重摩三舍退
愁城新破獨身跳
脩然自入羲皇夢
不與靈均賦大招

秋夜待曉

熏籠烟暖碧霏微
紅蠟燒殘玉漏稀
連日五更風露重
八蠶輕絮蚤時衣

張西園先生有知己之言歿而余念之不忘見其
令孫澤長於京師別後却寄

遺老流風迴絕塵
西園文酒十年頻
公為東野忘年友
僕比文通是恨人
喜見孫枝頭角長
愁看馬鬣歲時新
隻雞惟記迴車約
宿草春風又濕巾

久雨

卯屋漂搖裏風雷勢轉嚴
林鶯過棟樹巢燕語窺檐
愁卷蕉心長憐生草意纖
蕭森老藤簾收取待曦炎

春日釀酒夏乃大熟小飲
輒醉名曰清明酒志時也

春酒濃香隔舍聞風檐開
釀已微曛日長方丈中庭
地卧看青天萬變雲

故篋中見亡友米紫來製
壘

松煤寒翠結輕塵舊法新傳易水真老注蟲魚成底事
非人磨墨墨磨人

種柳

種柳樓前拂檻時春愁秋雨兩三枝天涯一種消魂樹
不必人間有別離

夜

雨苔幽徑暗娟娟檐外流螢照濕烟行過後庭新月上
半窻花影送人眠

霞

不盡殘陽意留情與斷紅嶺橫一窈窕山疊遠玲瓏拂
樹依微靄當樓倩晚風更看芳夜月相映海雲東

七月三日野宿二首

晚景橫門外關山北路分蟬聲咽疎雨馬首帶殘雲籬
拆秋花重溪香暮草熏城鐘夜方寂野宿幾迴聞

初月挂西城新秋夜色清白楊風似雨素髮暗還明山
鬼欺殘夢樵人責舊盟覺時忘枕席貪聽石泉聲

中秋同諸子集城南張氏園三首

羈栖憐積雨池館得新晴
暗水入何處歸雲行有聲
幽花依晚徑高柳向秋城
同有濠梁興因知谷口情

渚蒲秋更短寒色滿魚梁
過雨苔妨屐迴風竹礙廊
禽言多晚霽蝶粉退新涼
時序何邈謝吾生正渺茫

題額丹青在孤亭映夕曛
地連滄海月樹宿女牆雲
罷酒因風急裁詩許夜分
歸時泰壇路已有玉笙聞

張氏園與樾阡孝廉感舊

古城幽徑寓閒愁。羣屐依然似勝流。雨過斷雲連水榭，
日斜疎樹隱山樓。五湖別後三年月，四序饒他一半秋。
眼底光陰鑪畔酒，幾人時節與同遊。

蚤起送王生君擢還太原

霜風伺我出布被，且相溫牕月白復暗壁。燈明暫昏流
塵空，客館落木滿闕門歸去。情猶爾，天涯安可論。

夢樊溪

烟雲枕席未分攜，五點更號三度雞。不是當關呼不起，

迷花倚石在樊溪

登樓望西山懷阮亭

雲樹西來又已秋
太行盡處是南州
連山萬疊空迴首
落木千門一倚樓
笛裏柳梅渾欲動
鏡中霜雪浩難收
玉珂接近朝天客
日日金門半日留

至日陪祀同王阮亭靈祐宮蚤起懷彭羨門

顛倒衣裳夜杳冥
暗窓微火似秋螢
迢迢曉漏聲猶在
斷續寒衾夢未醒
烏宿多時翻落月
馬行幾點傍殘星

相逢鸞鶴朝真去回首紅塵眼共青

乙亥除夕同樾阡孝廉虞箴郎君程三蒼崕孔大
雲岫竇大在茲舍弟與可兒子豫朋壯履猶子

觀顥復剛守歲

雪晴風緊歲云徂
捩馬林鴉興不孤
人靜千門空爆火
天迴午夜一屠蘇
貧休送鬼驚吾老
悶可藏闔與客娛
已賣癡猷看利市
盡拈錢付酒家壚

除夜次樾阡韻二首

莫歎天涯行路難年年書劍報平安
文章鎖院三錢筆京雒春風十里鞍
白髮相逢人似舊青松不忘歲常寒
坐中竹柏盈盈酒黃色天庭取次看

烟煤兩版不曾除老屋東頭是敝廬
蝸舍冰霜今夜少兔園燈火十年餘
才名閱世誰如子肝膽逢人為起予
更有膝前文度美即看軒蓋擁門閭

丙子元日立春次廖虞箴上舍韻

晴光淑氣兩無涯元朔王春感歲華
上日相隨青帝駕

新年一到玉皇家

所居近玉皇觀

天真省事知憐老客有登歌

敢拜嘉共道五辛風味好堆盤紅縷間椒花

東坡元日立春詩省

事東風厭兩回

春夜寒甚與樾肝飲酒戲作二首

甚矣吾衰及此時鶯花相避意差池書空咄咄非殷浩
自喜沾沾過魏其紅蠟似消春後凍青陽不染鬢邊絲
無多酌我聊相勸泛溢東風在一卮

碧落風多颭酒旗金波新漾影娥池杓將寅指知春蚤

參欲昏中問夜其厭事朝來似犀首亡何日飲學爰絲
與君細忖人間世判斷閒愁付濁卮

疊虞箴元日立春韻

頌椒剪綵亦生涯春日新年送物華北極朝元還卧閣
東村迎氣記山家辛盤青韭來河朔小宴黃柑擘永嘉
應見秦階多勝事和風先報曲江花

次韻姜西溟孝廉見贈生日詩二首

名高萬丈焰生光自忖纔如襪線長四海君才多武庫

六星天意一文昌幾逢李蔡虛東閣每訝彭宣到後堂
為報鎖廳春日近梅花三候發巖廊

名在金鑾學士坡三條紅燭照春多

君以史職
試春官

晉音亦

自知師曠楚璞今當識卞和老去東華同載筆時來南
陌羨鳴珂相思勿憚寒廳宿愁月淒風奈樂何

人日絕炊戲簡樾阡

絕炊人日有風情辟穀年來道欲成杯淥乾傳傳坐酒
突烟冷稱膠牙餠蠅蛇幾度為家口雞犬連朝過夏正

笑煞青春慳一飽朱門空鎖五侯鯖

樾阡不和人日詩送酒一壺以促之

春來飢火共相燒何事清齋坐寂寥
九食三旬應漫浪元正人日並蕭條
尊羹誰可加鹽豉菜把空煩送柏椒
淡淡茶湯薄薄酒讓他梁肉過今朝

蚤春簡羨門少宰

彈鋏相從少壯遊班荆斜日玉山秋
春風幾度過燕市明月依然在薊樓
八代文章官吏部漢朝經術爵通侯

與君小別朝元會每誦新詩斷舊愁

元日公誦
新詩示予

題翁康飴為敦復尚書畫龍眠山林圖二首

寥落樊川杜牧之秦城烟樹遠參差如何得似舒州老
管領雲山弔伯時

畫手詩人遠擅場龍眠巖壑輞川莊依然居士風流在
猶見丹青顧長康

為雪鵑禪人題董文敏書二首

規撫北海姿還在跌宕吳興致亦豪屋漏斷痕釵折股

何人解是郭兵曹

草亭神采映當時玉匣金匱屢豈知多少書中殷鐵石
到門試問永禪師

過海棠院花未開作二首

縹緲紅粧態未完曉鬟初整綠雲寒墨花尹白風流甚
只恐輸他黑牡丹

白髮逢春惱別離東皇作意遣花遲即無著雨胭脂色
不到殘紅淡粉時

喜晤張肅昭侍御

南臺迴首共簪纓
忝竊銅街避路行
對仗蚤知

明主意回天因識直
臣名歸來肝膽輸
流輩別後鬚眉
見老成今夜府中人
似昔曉烏啼徹舊
離情

盤山拙菴禪人索詩二首

青溝依約白毫光
眇眇禪栖在上方
師向中盤中處住
東西南北不思量

舊遊題句記吾曾
欲學初禪愧老能
一卷紅樓青嶂客

不嫌人喚作吟僧

懷盤山答拙菴

布穀響春城春山寄遠情紅泉連雨曉白鳥破烟明塔影飄西塞峰雲下北平松門曾杖策從此想無生

禹鴻臚為宮定菴通政畫其生平所歷為圖題得四首

觀海市

十二樓邊列五城羣仙出沒向空明蓬萊清淺麻姑老

孤島斜陽萬里情

登岱

日觀題詩海色迴人言太白是仙才
朱顏長與青童笑
玉女流霞蚤啖來

雪中獵洪山

使君千騎獵圍長雪夜風流在武昌
為報襄陽著舊語
呼鷹臺上笑劉郎

春宴黃鶴樓

黃鶴磯前綠草生遙連漢水鴨頭平蒲桃酸醅春酒熟
應似春江春水清

衡素虞歲試國子皆第一

玉贈金鑿憶故鄉機雲八洛有輝光併將海日江春句
寫入燕公政事堂